

Segun Parlamentario di AVP Donny Rasmijn

“Solucion duradero pa Parkietenbos Dump ta mi compromiso cu e bario”

Recientemente Parlamentario Donny Rasmijn a tene un reunion di contacto cu e bario di Blenchistraat na Simeon Antonio. E reunion a conta cu bon presencia di e habitantenan y a resulta di ta uno hopi efectivo.

Despues di a scucha Donny su jingle “Bon Trabou”, e reunion a cuminsa unda cu e Parlamentario a expresa cu lo busca un solucion duradero pa e dump na Parkietenbos durante di e Gobernacion venidero y cu e bario ta cerca di su curason. Ya pa decada e bario cerca di e dump tin molester di huma, holo desagradabel, musca, sangura y bestianan manera djaca cu ta producto di e dump. “Prome e sushi tabata wordo kima y tabata produci huma toxico cu ta contene dioxina cu por causa cancer. Despues cu e huma a wordo paga, e plaganan a bira peor pa e bario”, Rasmijn ta bisa.

E Gobierno anterior a purba dos plan durante nan periodo. Prome nan a traha mas espacio dor di destrui bastante mangrove pa coba un buraco grandi pa supuestamente abastecer sushi temporalmente mientras cu e Gobierno a bin cu un solucion duradero. Despues nan a bin cu un planta for di Merca como “proef



konijn” pero cu a costa Aruba 28 miyon florin y riba dje e ex-minister Booshi Wever a firma pa 21 miyon florin mas cu e compania en cuestion un par di dia prome cu el a baha como Minister. E Compania tabata wordo representa dor di oficina di abogado Croes, Wever & Tjong cu por cierto ta e oficina di tata di lider actual di MEP. “Mester bisa cu Eveline Wever-Croes tambe a traha cu e oficina aki cu a strica bon placa cu e proyecto aki sin cu a duna resultado”.

Despues cu e Minister a forsa pa e proyecto bay door, nan a paga 28 miyon pa e prome fase cu por cierto a resulta den un fracaso tecnico y economico. Fracaso tecnico, pasobra e maquinaria no tabata separa e sushi manera mester ta y

grinderman tabata kibra cada biaha pasobra segun e compania, no mester separa e sushi pasobra e mashin mes ta haci. E mashin tin ekiponan cu ta traha cu vapor unda cu tin presion y temperatura haltu. “Por lo menos dos biaha tabata tin explosion cu danki Dios no a resulta den desgracia di empleadonan”, e ta bisa. Den parti financiero e tabata un fiasco por completo pasobra pa cada tonelada di sushi cu e procesa, mester uza riba 240 florin di gas oil pa produci vapor mientras cu ta cobra 60 florin pa cada ton di sushi cu un compania ta trece na e dump. Y e productonan cu e ta separa ta sali contamina. En fin tur hende sa cu e problema t’ey ainda y cu tin casonan andando riba e proyecto cu a retrasa e solucion.

Mientrastanto Gobierno ta preparando un “bidding package” pa asina traha un planta pa gasifica e sushi existente y esunnan nobo y e gas lo wordo manda pa WEB como combustibel pa produci coriente y vapor. Despues di presentacion di e Parlamentario, tabata tin oportunidad pa pregunta unda cu diferente pregunta interesante a bin dilanti. Algo hopi remarcabel tabata cu e muchanan cu tabata presente a scucha cu atencion y hasta a haci diferente pregunta. Por ehempel e bario ta pidi pa un parke di recreo pa muchanan, mas vigilancia di

Polis den bario, mas luz den bario, embeyece e caminda di Barcadera pa asina hendenan por cana y core na un manera sigur, drecha parkeer plaats pa transporte publico y “speedbump” pa reduci velocidad di auto pa proteha e muchanan. Tur e puntonan aki ta valido y merece di wordo atendi tambe.

“Como cu nos partido ta cumpli cu su promesa, deseo y bienestar di nos pueblo, mi a priminti nan cu mi lo traha pa nan deseonan wordo logra. Tambe mi a haci un compromiso cu e bario pa bin cu un solucion duradero pa e dump na Parkietenbos”, Rasmijn ta termina.



Parlamentario di AVP Donny Rasmijn.